

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 393037 21 St
Tuzla, 10.11.2021.godine

Općinski sud u Tuzli, sudija Antonela Đaković, kao stečajni sudija, odlučujući o prijedlogu likvidatora za otvaranje stečajnog postupka nad imovinom dužnika **„LAMINA INŽENJERING“ d.o.o. za proizvodnju, promet i usluge Lukavac, ul. Magistralni put bb**, dana 10.11.2021. godine, donio je sljedeće:

RJEŠENJE

I-OTVARA SE stečajni postupak nad imovinom dužnika „LAMINA INŽENJERING“ d.o.o. za proizvodnju, promet i usluge Lukavac, ul. Magistralni put bb, matični broj subjekta:32-01-0010-08, broj glavnog računa: 5551101010419281 otvoren kod Nove Banke a.d. Banja Luka.

II-Stečajni postupak se otvara sa danom 10.11.2021.godine u 11,00 sati, kada se rješenje o otvaranju stečajnog postupka ističe na oglasnoj tabli suda. Oglas o otvaranju stečajnog postupka objavit će se i u „Službenim novinama F BiH“.

III-Za stečajnog upravnika imenuje se Fahrudin Arapčić iz Lukavca, ul. Titova Alfa 2/4.

IV-Pozivaju se povjerioci da u roku od 30 (trideset) dana, od dana objavljivanja oglasa o otvaranju stečajnog postupka u „Službenim novinama F BiH“ prijave svoja potraživanja stečajnom sudu dostavom prijave i priloga u dva primjerka u skladu sa odredbama Zakona o stečajnom postupku o prijavi potraživanja (član 110. Zakona), te prilože dokaz o uplaćenju sudskoj taksi na prijavu potraživanja u iznosu od 1% od vrijednosti potraživanja, s tim da taksa ne može biti manja od 50,00 KM, niti veća od 10.000,00 KM, na žiro račun broj 1321000256000080, vrsta prihoda 722221, primalac Budžet Tuzlanskog kantona.

V-Pozivaju se povjerioci da u roku od 30 (trideset) dana, od dana objavljivanja oglasa o otvaranju stečajnog postupka u „Službenom novinama F BiH“ stečajnog upravnika obavijeste koja prava osiguranja potražuju na predmetima imovine stečajnog dužnika. Potrebno je navesti predmet na kome se potražuje pravo osiguranja, vrstu i razlog nastanka prava osiguranja kao i osigurano potraživanje.

VI-Pozivaju se lica koja imaju obaveze prema stečajnom dužniku da ih bez odlaganja izvrše.

VII-Otvaranje stečajnog postupka ima se upisati u sudski registar Općinskog suda u Tuzli, zemljišne knjige Općinskog suda u Lukavcu, te kod Službe za geodetske i imovinsko-pravne poslove općine Lukavac.

VIII-Skupština povjerilaca (ročište za ispitivanje) na kojem će se ispitati prijavljena potraživanja zakazuje se za dan UTORAK 11.01.2022.godine u 10,30 sati, u zgradi Općinskog suda u Tuzli, ulica ZAVNOBIH-a bb, sudnica S4-prizemlje.

IX-Skupština povjerilaca (izvještajno ročište) na kome će se na osnovu izvještaja stečajnog upravnika odlučiti o daljem toku stečajnog postupka održat će se istog dana tj. UTORAK 11.01.2022.godine na istom mjestu nakon ročišta za ispitivanje prijave potraživanja.

X-Rješenje o otvaranju stečajnog postupka u cijelosti objavit će se na oglasnoj tabli suda, web-stranici suda–elektronskoj tabli suda, na internet stranici FIA-e, a u Službenim novinama F BiH objavit će se samo izreka rješenja.

O b r a z l o ž e n j e

Rješenjem ovoga suda broj 32 0 L 393037 20 L od 14.04.2021.godine, otvoren je postupak likvidacije nad dužnikom "LAMINA INŽENJERING" d.o.o. za proizvodnju, promet i usluge Lukavac, ul. Magistralni put bb, a Rješenjem suda broj 32 0 L 393037 20 L od 04.06.2021.godine obustavljen je postupak likvidacije nad dužnikom radi nemogućnosti društva da izmiri obaveze koje ima prema povjeriocima koji su u likvidaciji prijavili svoja potraživanja, temeljem odredbe čl. 9. st. 2. Zakona o likvidacionom postupku (Sl. novine F BiH br.29/03). Rješenje o obustavi likvidacionog postupka postalo je pravosnažno 28.06.2021.godine.

Na ročištu za ispitivanje prijave potraživanja u likvidacionom postupku održanom dana 03.06.2021.godine likvidator je izjavio da priznaje prijavljena potraživanja jer za ista postoje pravosnažne sudske odluke i izvršna rješenja, međutim likvidacioni dužnik nema novčanih sredstava, istom su blokirani računi, te nema nepokretne imovine, a pokretna imovina (mašine za obradu drveta, teretno vozilo koje nije u voznom stanju) je neznatne vrijednosti u odnosu na vrijednost prijavljenih potraživanja koja sveukupno iznose cca. 588.288,88 KM, bez zakonskih zateznih kamata i troškova postupka, zbog čega je likvidator podnio prijedlog za otvaranje stečajnog postupka nad imovinom dužnika "Lamina inženjering" d.o.o. Lukavac, Magistralni put bb.

Imajući u vidu da je prijedlog za otvaranje stečajnog postupka podnio likvidator, sud je shodno odredbi čl. 102 stav. 6. Zakona o stečaju FBiH (Službene novine F BiH broj 53/21), Rješenjem ovog suda, broj gornji od 01.10.2021.godine pozvao povjerioce i zainteresirana lica da u roku od 30 dana od dana objavljivanja istog uplate predjumu za obezbjeđenje troškova stečajnog postupka, u iznosu od 2.000,00 KM, koje rješenje je objavljeno u Službenim novinama FBiH broj: 82/21 dana 13.10.2021.godine.

Na osnovu izvještaja likvidatora datog u toku likvidacionog postupka sud je utvrdio da dužnik nema imovine iz koje bi se namirila potraživanja povjerilaca, ali da je prijedlog za pokretanje stečajnog postupka dopušten, zbog nesolventnosti i nelikvidnosti dužnika postoji stečajni razlog, a troškovi stečajnog postupka biti će podmireni iz predjuma troškova uplaćenih od strane predlagača Ekrema Kamberović iz Tuzle dana 08.11.2021.godine (iznos 2.000,00 KM).

Sud je shodno odredbi člana 102., stav 6, a u vezi sa članom 103 stav. 1 Zakona o stečaju F BiH (Službene novine F BiH broj 53/21), odlučio kao u izreci rješenja.

Odluku o imenovanju stečajnog upravnika, sud je donio shodno odredbi člana 104. stav 1. Zakona o stečaju F BiH (Službene novine F BiH broj 53/21) , a nakon što je utvrdio da isti ispunjava uslove utvrđene odredbom člana 71. istog zakona.

Sud je, odluku o određivanju ročišta za ispitivanje prijavljenih potraživanja i izvještajnog ročišta, donio na osnovu člana 106. Zakona o stečaju F BiH (Službene novine F BiH broj 53/21).

Odluku o objavljivanju otvaranja stečajnog postupka, sud je donio shodno odredbi člana 107. stav 1. Zakona o stečaju F BiH (Službene novine F BiH broj 53/21).

Na osnovu odredbe člana 105. Zakona o stečaju F BiH (Službene novine F BiH broj 53/21), sud je uputio odgovarajuće pozive povjeriocima i dužnicima stečajnog dužnika.

Upis otvaranja stečajnog postupka u javne registre određen je na osnovu odredbe člana 108. Zakona o stečaju FBiH (Službene novine F BiH broj 53/21).

Stečajni sudija
Antonela Đaković

POUKA O PRAVNOM LIJEKU: Protiv ovog rješenja žalbu može izjaviti stečajni dužnik. Žalba se podnosi Kantonalnom sudu u Tuzli, putem ovog suda, u roku od 8 dana, od dana dostavljanja rješenja. Žalba iz prethodnog stava ne odgađa izvršenje rješenja.